



Broj: 05-01-14-5492/21-3

Travnik, 18.11.2022. godine

Predmet: **Saopštenje za javnost, dostavlja se**

Poštovani,

Vezano za najavljenju press konferenciju Kreševskog pokreta i neformalne grupe građana Poriče iz Bugojna i poziv Ministarstvu privrede da raskine ugovore o koncesiji za kamenolom Rastovice i Krčevine, te kamenolom u Bugojnu u nastavku vam iznosimo odgovore na postavljene zahtjeve.

Ministarstvo privrede je na osnovu Odluke Vlade Srednjobosanskog kantona sa društvom „BFS“ d.o.o. Sarajevo sklopilo Ugovor o koncesiji za istraživanje i eksploataciju mineralne sirovine kamena krečnjaka i dolomita na lokalitetu „Rastovice“ i „Krčevine“ – općina Kreševo, broj: 04-18-1492/14 od 23.11.2018.godine (u daljem tekstu: Ugovor o koncesiji). Privredno društvo „BFS“ d.o.o. Sarajevo, nakon potpisivanja Ugovora o koncesiji, nije pribavilo odobrenje za istraživanje i eksploataciju od Ministarstva privrede Srednjobosanskog kantona, a obaveza pribavljanja navedenog odobrenja propisana je članovima 9. i 10. Zakona o rudarstvu („Službene novine Srednjobosanskog kantona“, broj: 15/01, 3/10, 8/12 i 7/20 – u daljem tekstu: Zakon o rudarstvu). Redovnim i vanrednim inspekcijskim nadzorom rudarsko-geološke inspekcije Ministarstva privrede, a shodno nadležnostima iz članova 119. i 120. Zakona o rudarstvu, utvrđeno je da je privredno društvo „BFS“ d.o.o. Sarajevo, na lokalitetu „Rastovice“ izvodilo rudarske radove na eksploataciji kamena u suprotnosti sa članovima 9., 10., 16., 45 i 83. Zakona o rudarstvu, te prekršilo preuzete obaveze iz člana 4. Ugovora o koncesiji.

Kako koncesionar nije izvršio (preuzete) ugovorene obaveze iz članova 4., 5., 18., 26, ispunjeni su uslovi iz člana 22. stavovi 2), 3), 4), 5) i 6) Zakona o koncesijama za raskid Ugovora o koncesiji, **te je Ministarstvo privrede predložilo Vladi SBK donošenje Odluke o raskidu Ugovora.** Vlada Srednjobosanskog kantona, Zaključkom 01-04.1-149/2022-16 od 13.01.2022. godine **nije donijela Odluku o davanju saglasnosti za raskid predmetnog Ugovora**, te je istim Zaključkom zadužila Ministarstvo privrede da pripremi Izvještaj o stanju koncesija.

Ministarstvo privrede je u Izvještaju o stanju koncesija **ponovo zatražilo od Vlade Srednjobosanskog kantona saglasnost za raskid Ugovora o koncesiji za Rastovice i Krčevine.** Vlada Srednjobosanskog kantona, Zaključkom broj: 01-04.1-535/22-16 od 27.01.2022. godine obavezala je sve koncesionare, koji nisu dobili dozvole za eksploataciju i istraživanje predmeta koncesije, da iste osiguraju u roku od 60 dana. Također, obavezala je inspekciju da pojača kontrolu ekoloških dozvola i da u slučaju ne pridržavanja ekoloških dozvola zatraži raskid ugovora. Nakon što je protekao rok iz gore navedenog Zaključka, **Ministarstvo privrede je ponovo, zbog nepostojanja dozvola i kršenja odredaba Ugovora o koncesiji, zatražilo saglasnost Vlade Srednjobosanskog kantona za raskid predmetnog ugovora sa koncesionarom BFS d.o.o. Kreševo.** Vlada Srednjobosanskog kantona, Zaključkom broj: 01-04.1-7728/2022-14 od 06.10.2022. godine, **nije prihvatila izvještaj o koncesijama iz nadležnosti Ministarstva privrede i nije dala saglasnost za**

**raskid Ugovora o koncesiji za lokalitet Rastovice i Krčevine sa koncesionarom BFS d.o.o. Kreševo.**

Vezano za koncesiju za kamenolom u Bugojnu, informišemo Vas da je Ministarstvo privrede, shodno Zakonu o koncesijama, provelo proceduru dodjele koncesije putem javnog poziva, te na osnovu Odluke Vlade srednjobosanskog kantona o dodjeli koncesije kojom se zadužuje Ministarstva privrede da postupi po istoj, zaključilo ugovor o koncesiji sa koncesionarom za kamenolom u Bugojnu.

Pozivamo vas da i dalje pratite postupanje po ovim predmetima, kako bi se osigurala najbolja korist za lokalnu zajednicu na čijem području je predmet ove koncesije.

S poštovanjem,

Ministarstvo privrede